

周益公文集第三十五

省齋文稿卷第三十五

采廬陵周益公必大著

墓誌銘五

墓表附

朝請大夫知潼川府何君

耕

墓誌銘

淳熙十四年

公諱耕字道夫姓何氏世居濮州之綿竹縣曾大父
 杲大父延世號休庵居士輕財好施食客日數千人
 與同郡德陽史彬善以其子革為彬婿即公之父也
 贈朝請大夫彬教授弟子以百數號絕學先生兩家
 既通婚姻何氏亦占籍德陽矣公甫勝衣從外祖學
 詞賦警敏異群兒更授尚書覃思精義東西川名士

張行成任愷繼為郡博士皆奇之方弱冠類試奏名
第一時紹興十七年也自行在吳中蜀士不預廷試
例賜魁進士及第命官視甲科第三講和後稍來奉
大對時秦益公當國論禮部上尚書凡不至者第一
等並賜進士出身今後準此入熟畫可遂為故事蓋
自公始以左迪功郎充彭州州學教授用舉主陞從
政郎教授成都公天資高明積學勤篤士聞風四面
至帥守監司交薦之改左宣教郎領職如故制置使
沈介轉運周綰何逢原皆中朝名勝待公以異禮

今上登極轉左奉議郎移成都府路轉運司幹辦
公事官長查籥負才易公公遇其施設未安必反復
告之籥大敬愛吏部尚書汪公應辰儒宗嚴許可以
文章典雅科薦公俄通判成都府乾道四年綿漢大
饑公治帥檄賑濟過家率族黨發私廩為之倡里富
人獨閉糴公登門曉之弗聽械繫其家人遠近輸米
相踵全活不可計文人晁公邁為提點刑獄詩以美
之會邛蜀間盜發帥遣將將數百人命公督捕公宣
示息信譬以福禍尋即解散權知蜀州撫摩善良繩
治姦猾郡以大治盜復起鄰邑州民驚擾公立木四
門大書曰衆劫民財者斬有材夫攫鬻物於市者罪

當流部使者欲殺之且責公自叛其說公曰前令為率衆而劫人者設今一夫攫物耳非姑息也使者愧謝居傾之丁太宜人憂蔬食三年出居僧舍自號恬庵騎叟以布裘鐵環竹杖等五物為五友若無意於世者免喪踰年青羗寇沉黎虞雍公為宣撫使檄公守雅州諸司調西兵來戍公曰蠻敢侵邊貪吏實啟之其患常在外今多屯兵必損郡計脫不滿意且內訌是復心之疾也守誠潔已奉公戒城寨官無黷貨生事訓練州兵優恤士丁蠻何足患其後八年黎境再擾制置司調戍兵益衆將非其人果作亂人服公

稍

先見知果州改嘉州課常為諸郡最除潼川府路提點刑獄公事作諭民詩四十二篇語平易而教化寓焉郡邑家有其書強暴犯法父老必譙曰汝不誦何公詩乎往往知悔淳熙四年勅差監四川類試得士為多是歲被召明年入對論恢復四事且曰願陛下內定其志外脩其具改其實無聽其虛言畏無難於今而成功於後日上曰卿所言盡之矣拜倉部員外郎改戶部郎中兼國史院編脩官侍講東宮未幾遷國子司業就陸祭酒改太子侍讀講禮記終篇及史院進四朝志皆增秩一等從祕書監丐外知

潼川府請祠未報以十年六月乙卯卒于州之正寢
享年五十有七既詔公主管玉局觀不及拜矣積官
朝請大夫娶同郡李氏封宜人前公四年卒三男德
方將仕郎德彥迪功郎新邛州司戶參軍德固迪功
郎新嘉州州學教授三女德秀德珣德蠲適進士王
璿閔鎔李允孫男七人居安慶傳遷僧卿月早夭今
存者曰惠雲登雲法雲即其年九月乙酉葬于縣之
義合鄉元池里與李宜人同域而異藏公有文集百
卷藏于家予未嘗至蜀而多識蜀士夙聞公有盛名
紹興末外舅圭公葆守漢海道公之歿歲在戊戌予
在翰林而公寔來一見如舊交已而僚于東宮于史
院予既知公公亦知予自公云亡懷思不已今德彥
德固同登進士第泣請銘公墓義不得辭竊嘗評公
於書無不讀而得其要於文無不能而根諸理立朝
端諒敢言典郡豈弟人不忍欺其持心雖厚而臨事
剛不可奪其造行甚謹至適性亦通而不拘當仕則
仕當止即止惟其時而已矣始蜀先進久歆板公于
朝公未嘗有所就虞公秉政知公特深迄莫能致也
趙沂公入相薦公為郎公積閱雖高然寄祿未至大
夫為中郎滿歲乃可任子素友愛季弟憐其早世撫

孤德崇過已子將命以官於是翻然而起至則忠嘉
合 上意譽望動楮紳朝廷進退蜀士多以公言為
輕重學省蓬山極道德文章之選公俱為之長視禁
塗跬步可登一日忽悼亡浩然有歸志日夜求去人
爭欲留公予時為承轄亮公誠慙莫敢遏也蓋公之
行誼文學出處去就大略慕唐白樂天而耽翫釋氏
躬持齋戒尤與之同嗚呼斯亦賢矣是宜銘曰

珪璧其德

松筠其節

何以文之

惟學與識

宜公宜卿

我則自柳

宜老宜期

天曷爾嗇

寧非劬躬

以燾奕葉

邈乎來今

尚考斯刻

啟元愷墓誌銘

紹熙二年秋

段氏自唐成式刺吉州後家永新至諱準者徙居郡
城故為廬陵人準生居簡居簡生世臣族系寢蕃兄
弟繼登科號稱儒家世臣生子冲字謙叔一上南宮
不肯為新學退築芸齋藏書數萬卷朝夕雙校自號
潜叟即以遺逸八行薦不就政和中太守程祈學有
淵源尤工詩佐郡六年日與謙叔唱酬其和梅花展
轉千詠人歎其博所著書號螺川集多至百卷程為
前序資政忠簡胡公作後序是生五子君次三名元
愷字達信儀表偉岸襟度坦夷始從進士舉值兵亂

棄去輕財周急鄉里仁之域有持論不公行已弗正者輒面折不少恕人更服其忠簡公與謙叔有師友婚姻之契待君甚厚每觴詠必連旬暨予卜居城東與君為憐君長子二十五歲而精神非予所及獨棊品酒量均劣可相追隨淳熙二年正月予赴行在所君來宿舟中飲奕達旦而別五年夏予在玉堂猶得其書是秋乃聞君以七月十一日卒享年七十有八後二年十月丁酉葬本縣儒行鄉桶井之原妻劉氏前卒瑩相望也二子人傑世其家人鑑為季父錄後孫男六人晞尹晞晏晞說晞周晞顏晞歸孫女三人長適歐陽興祖次適劉慶遠一尚幼初君疾革語其子曰胡公知我深今君里中必有詩文哀我銘則屬諸內相小子志之既沒其子以遺命告雖諾未暇逮一星終予奉祠歸人傑泣申前請乃為之銘曰

惟利與名 遂逐營營 外物重焉 在已必輕
孰如達信 樂以全生 尚論潛得 度幾天民

提轄文思院葉君楠墓誌銘 紹熙三年

君諱楠字元質其先合肥人慶曆中徙家池之貴池曾祖亶祖茂公嘗贈宣教郎母吳氏繼母程氏皆贈安人君力學早成登隆興元年進士第調鄱陽尉夏

早繼以秋勞君請盡蠲田租守難之君言境內蕩屋廬者七百餘家溺百八十人流徙相望盜賊將起欲惜費得乎守悔悟減租十九江州軍帥苗定御下過寬士卒六七輩掠君所部君檄取數四不報君引右誼質責竟正其罪以繼母憂去官服闋注岳陽軍節度推官未上又丁父憂終喪授邵州司法參軍用舉者陞從政即封州州學教授地苦瘡癘三歲郡官死四十餘人君悉力調護其家割俸助之淳熙十年改宣教郎知徽州績溪縣縣統十鄉里正苦差役追擾君與約曰受二鄉文書八鄉得番休力役不疲官事亦

雜人以為便爭欲及君時充役其催科尤不擾民皆

樂輸惟恐後訟牒日省君乃斥添給不受積至千五百緡大葺縣學買監書二千七百餘卷市良田三十六畝士民歌曰前有黃門後有葉君蓋蘇文遊公嘗宰此邑也十五年轉奏議郎明年覃恩轉承議郎賜服緋魚諸司疏治狀有旨任滿審察上初政首用提轄轄文思院命下一日卒於旅旅耶十六年六月三十日也績溪士民聞訃嗟泣享年五十二是歲十一月十六日葬青陽縣北七里豐林之原娶汪氏封孺人子之真女尚幼君篤實勤敏臨事慷慨數上書論

天下皆考證古今別白利害從政務行其言未嘗苟
且平生喜著述有知非集五十卷精金訓鑒二十卷
童蒙記十卷始乾道丁亥九月予舟過池陽唐寅與
客騎遊九華道由鐵券出中有華屋四山環合是為
君家之父置酒留宿見二子焉長即君也方待鄱陽
闕明日與予並轡至青陽又明日出郭西南行登雙
練亭觀雙瀑步至上下雪潭宿協濟廟溪聲如大雨
予與客踏石涉水為戲獨君魁梧遂墮水中衆客大
笑又明日登化城峯謁金地藏塔訪龍女泉李太白
書堂蓋九華最高處也東下數里上龜山尤險峻君
忘其勞褰裳糲從詰朝由墓善鎮入五溪傍距鐵券
纔數里乃別去自是無歲不相聞庚子夏予與華亭
錢公師魏同在政府師魏嘗分教于池與君善共議板
君君徑從吏部調官封州予二人既憐君遠官又默
嘉其恬於進取而愧不果薦進也已而部使者爭舉
君改秩又明揚績溪之政有列于朝且用矣孰謂綬
未結而續已屬悲夫君之季綦繼登科第狀君行實
求予為銘予雖諾而未暇其嗣子不遠千里訪予長
沙垂涕固請何敢以老詩辭乃為銘曰
嗶嗶者車安行九折之塗而僨乎四達之衢吾不

知其何如尚鍾美于遺孤以增光于厥初

墓表

朝散郎致仕郭公彌約墓表

淳熙戊戌七月甲申廬陵郭公卒予其子與國太守份之官舍越明年冬十月己酉葬于吉水縣雷田之原同郡新廣東常平使者楊公萬里狀其行實敬授鄉先生端明致學士澹庵胡公胡公為作銘傳信無窮與國曰銘納諸窳懼無以表于阡乃斷石為方趺圭首走介入都屬某以辭追念往歲扁舟過公於梅溪其地在臨江軍新淦南一百二十里亂山還合中特

平衍公始卜築氣象殊軒豁別創佚我亭為燕息之所屢求予作記予懶且病閱十四年未能成今公既沒若遂無一言是忘昔人掛劍之義矣其可乎惟公才甚高學甚勤志甚大惜命之不副方少時讀書為文已卓然不群意富貴可唾手取既齟齬每以自發則畫兵機數十策往撼兵將軍將軍奇之奏以官歷三任咸有績可絕絕已而歎曰徒勞耳掛衣冠而去是時與國已用家學第進士皆彼堂選仕于四方公欣然就養歸則教督諸孫以餘力稍從事田園然不求富也歲時醜酒烹羔與里父老游人有緩急輒赴之

往來廬陵臨江兩郡間不可得而親踈士大夫甚貴
重之與國既擢任二千石諸孫雋邁力學嘗再舉于
鄉公亦連值慶典數進文階佩服煒煌福與祿俱
年八十有二乃卒嗚呼如公尚復奚憾而予猶云云者
蓋公平生刻苦專精凡六經諸史下至天文地理無不
究其旨趣而又天資敏明遇事不苟博極世務識高
而慮遠大欲為國家立功名垂竹帛其小猶將撥繁
治劇行志於州縣二者適不遂故以仕學遺後人而
身享壽考康寧之福校其得失雖未易輕重然天之
生才常艱^幸而有人乃徒善其身及其子孫而無矣
施諸人識者莫不太息則予謂之命不副者可不可
也故表而出之矣告後之君子公諱彌約字景聞其
世闕爵里言行出處二公書之詳矣淳熙六年十月
十日太中大夫試禮部尚書兼翰林學士兼侍讀
一兼太子詹事兼脩一國史管城縣聞園伯食邑八
一百戶周^公述

籍溪胡先生^憲墓表


先生姓胡氏名憲字原仲崇安人紹興庚辰與其同
為祕書正字原仲年長過倍予敬而親之原仲尤相
愛每同舍退往往畱語竟日原仲自言少從其從叔

文定公傳論語學時時為予誦說以為入道之要也
明年原仲上書論事求去 天子待之良厚措紳皆
榮其歸官長玉山汪公聖錫合館職七人置酒道山
堂以先生早賦歸去來之句分韻賦詩餞別又明年
而原仲沒今蓋一世矣其孫親仁遠來長沙出門人
祕閣脩撰朱元晦所作行狀求表其墓凡其家世出
處問學本末元晦紀次有法行遠無疑若夫懷思舊
好尚論師友以慰夫慈孫之心則亦不得而默也自
堯舜禹湯文武周公以道相傳見諸行事所謂師弟
子之說固不必論惟孔子繼聖有作無時無位折衷
六藝授之門人固嘗自謂文不在茲乎而終有天喪
予之歎者以顏既死曾子晚方傳道其餘則所得未
深其器未大也馴至戰國異端浸起獨孟子因師說
僅續不傳之緒然諸子百家已復並行道述自是分
裂至秦遂一掃而空之漢興諸儒稍習六藝之文而
不知明聖人之道專門名家互相矛盾凡道德性命
之理仁義禮樂之具視之蔑如又其久也雖訓詁章
句猶且前無所承後無所授况其上者乎韓退之晚
出於唐頗以師道自任終亦莫能棟也天啟 聖朝
世與道興上而元臣大老信此道以覺斯民下而老

師宿儒進此道以覺後覺然後之人聖賢事業本非
空言間有操持或謬趣尚或僻者相語辭而闕之縱
未能盡得周孔之傳其視歷代從事末流失其指歸
者固已不同乖離千歲庶幾復合茲非師友淵原之
効與方其盛時伊川程公正叔之門從學者衆上蔡
謝良佐顛道最為高弟以其所得授之文定公康侯
而涪陵譙定天授亦學於程氏者原仲既傳其家學
復往問易於譙譙謂其學有不可以言傳特為原仲
稍發其端原仲因誦所聞譙弗許曰心為物漬則不
能有所見惟學及乃可明耳原仲退而求之久乃有
得喟然歎曰所謂學者克己工夫也由是自信不疑
篤志力行以至於老中間可仕則仕必行其道可止
則止必至其義近而一鄉遠而四方皆師尊之於是
元晦以先大夫之命事原仲如父既盡得言行之美
而又日進焉今歲為世儒宗豈無所自而然哉顧予
何足以知之姑述見聞附元晦所書之後使親仁歸
併刻之以告來者年月日具位周某書

省齋文稿卷第三十五

周益公文集第三十六 省齋文稿卷第三十六





墓誌銘六 葬記附

伯母安人尚氏墓誌銘 紹興二十二年

夫人姓尚氏世為相州安陽人故金吾衛上將軍從
諫之曾孫太中大夫斐之孫朝請大夫直龍圖閣佐
均之息女也生而淑慧長而柔閑族黨異之龍圖公
以碩德鉅儒徧儀清綴崇觀典禮皆所是正夫人組
紉之暇侍立左右緝經閱古間有禪益既及笄龍圖
公方為少司成妙選儒流將作之合謂我伯父辰陽

盧陵周益公必大著



府君諱利見文學行義蜚聲上庠故以歸焉周氏為
鄭鉅族於時曾大父中奉大父太中皆無恙內外百
口婦道為難夫人事上以孝待敵以禮接下以和無
間言者初祖堂之側有腴田焉其主將售之太中欲
謀而未有力夫人適大歸密聞其議啓伯父曰吾奩
具可出也近墳之地顧可使它姓得耶伯父以告太
中大悅其田遂歸於我靖康間從伯父守官陝服虜
騎夜至盡捐家貲獨取伯父所好文籍筆硯使婢挾
之以逃亂定伯父見而喜曰吾獨念此君幸全之它
不足計也繇是益重其賢伯父之為辰州有大姓以
私匿亡命抵獄寮吏讞欲殺之伯父歸而疑其故夫
人曰官有常法疑則從輕可伯父之意遂定其人以
全掌畫游郡園道遺蕭飾厥直數萬求之不獲伯父
御下素嚴一府震懼夫人戒左右使勿敢言俄得其
盜則既分毀之矣迺使子弟慰諭而遣之伯父平昔
宦游勤于官政未嘗問及私事夫人以身任責故伯
父得行其志粵自南渡遭象多難遺孤滿目伯父收
集教育奉入或不能給夫人以約為盈憐拊備至凡
家者莫能辦其子姓戚疎也辛未春伯父即世
于虔貧無甌石夫人殊不介念而益勵子姪以學使

無忘前人之志家有故笏蓋曾高特物其後繼世擢
第轉以相授今年秋度卒內訂蒼黃出犇身外無復
一物及門夫人獨悵然曰古笏不可棄也亟命健者
反取之以行其識度類如此俄以疾終于廬陵紹興
壬申十一月癸丑也享年五十有五嗚呼伯父之喪
縗斬未除而天不憖遺仍降大禍為善之報無所憑
矣夫人慈惠有容待人一以誠信化行相內下不忍
欺教督諸女俾熟於詩禮咸謹婦道姻戚儀之初以
伯父陞朝啟封孺人再命為安人生四男必達必端
必正必先四女長適右從政郎呂坦中次適右迪功
郎李延世二蚤亡適李氏者亦亡矣孫男一人曰繹
孫女三人諸子卜以是歲十二月甲申日舉夫人之
柩祔葬于吉州廬陵膏澤鄉金鳳山伯父之塋永惟
夫人之淑德懿行當求巨筆勒銘幽窆以襄事之逼
也故諸兄命某誌之夫詞主乎信則無飾情極乎哀
則無文勉竭肺肝紀實而已銘曰

倚歎夫人 女子之師 來嬪夫家 婦順母慈
始終于仁 宜燕其晚 胡戾于天 而報之簡
凡我族屬 洎厥後昆 惇惇失恃 誰村誰存
涉江而東 有崇其岡 伯父是卜 龜猶告藏

歷吉撰良言歸茲宮銘号止此
哀則無窮

先夫人王氏墓誌 乾道二年

先夫人姓王氏錄高祖階州太守諱亮而止世家博
陸至曾祖左金吾衛將軍諱察始葬安陽祖息州太
守贈少師諱復考給事中贈少保諱靚又開國馬遂
為安陽人妣衛國夫人朱氏——先夫人幼善女工通
繼史博知古今事不自以為能而孝友柔順是專間
遇親疾皇皇戚戚竭力盡志惟人事之窮聞古有所
天代死剖体和藥者皆屢為之以是父母尤鍾愛年
十有七遴擇所歸會先太學博士府君魁釋褐多士

有大名遂歸焉未一星終先君即世先夫人奉大
母碩人若吉於是伯姊生十年某甫四歲亡弟歲未
周遭世多艱虜驚盜剽轉徙乏食課婢採橡實蔬苗
共養大母次給尊幼必均寧己之餒如是者連月初
外氏世顯仕衛國又相丞元憲公孫丞相龐莊敏公甥
先夫人少習長誠富貴事也一旦驟履艱窘雖寧
人子不能堪處之熙然聞者以為難平若識慮高遠
有大庇宗族姻戚之志而不克遂然隨事周急人已
懷之紹興丙辰衛國道廬陵大母命先夫人歸寧遂
偕行寓信州時某齒少長矣先夫人躬督誦書常

至夜分未辨色則以杖警于榻使卧而覆之又教以
屬對賦詩已而曰舉業非吾習也為擇汲人陳先生
特使從之先生弟子以百數 先夫人一衣之華一
味之甘輒命某奉焉先生歎曰有母如此吾忍負之
故教某甚切其不能有所成者某質凡也不幸明年
衛園病 先夫人省視藥餌癯寢與食躬難能之孝
有加於昔暨薨晝夜號慕至累日水漿不入口人固
憂其毀而某冥頑惇戾不能解釋調護如 先夫人
所以事父母者萬分_{之一}竟以戊午歲正月十八日不
起會疆事未平亟以二月十六日就葬州北之茶山

壽止三十七後某為祕_書省正字遇沛澤贈孺人忝
御史再贈安人五男女_伯弟適右宣教郎賜緋魚袋
尚大伸婦頌母儀其來有自吾兄平叟不及名吾弟
必彊有雋才再預鄉薦年三十三而死吾妹吉孫亦
早夭孫一人綸惟周氏再世卜葬廬陵縣豪澤鄉金
鳳山 先君諸父以序陪列獨 先夫人葬他邦遐
想松楸魂飛心折隆興元年春某賴夙訓蒙 上恩
入侍延和殿頓首言願假外祠以畢遷奉 詔可之
歸與姊謀會病未果乾道二年三月姊又卒孤立自
悼益懼溢先朝露弗遂厥志乃以十月如上饒十一

月庚戌啟士翼日護匱以行十二月壬申達于吉顧
視先塋兆域相邇不可以祔別卜地於夾河二里
間惟長岡之麓食鄉猶濠澤也庚寅甫窆丁酉定鳴
呼我先夫人孝於親不獲其報艱厥躬弗償以壽
裕乃志弗究其成十年教子而不及享一日之養天
不可問理不可詰將錄某為禍為逆天罰崇降而底
是邪承祀任重不敢殞滅願以未死之年長守丘墓
九原之心庶少慰乎以襄事之迫未能求當世名卿
紀述潛懿姑用不孝辭誌遷改歲月云孤寡子左
承議郎主管台州崇道觀某泣書

亡姊尚氏夫人墓誌

乾道二年

乾道二年三月己巳伯姊姊以疾不起於尚氏之寢越
六月甲申將葬于吉州廬陵縣濠澤鄉珠禾之原嗚
呼昔我先君先夫人皆以惇碩慈孝不獲下壽而亡
弟子柔雋明傑出又中道而夭獨吾姊肖美鍾料克
備衆德意必享有耆福為世矩範而天命不延壽止
於四十有七名不列於命婦之籍淑問懿行奄忽以
歿嗚呼某尚忍言之周氏世家鄭夫人曾祖中大夫
諱衍祖左太中大夫諱誥父朝請郎太學博士諱利
建妣安人王氏惟吾家與安陽尚氏舊為婚姻故夫

人年有六歸今右宣教郎前知贛州寧都縣賜緋魚袋大伸實政和園子祭酒佐均之婦天性敏悟知書達物理嫁時雖少已能代姑主相政御下有法度接物極和易與人言惟恐傷之及臨事果斷不惑凜然有烈丈夫之風處大利害略不動聲色平居言弗妄發至論事成否語逆順莫不中理間有請問舊事則雖未亂時耳目所經歷者細大畢記其道上世流風遺俗本末曲折使人聽之灑然凡與寧都遊者往往周知其宗族出處分別淑慝至於慶弔交際皆使薄厚中節初莫見其頤指之勞寧都仕官不偶生事屢空然個儻喜賓客樂施與家之有無不暇問也夫人節其豐儉彌縫調護人莫能測平居將順規切兩得其宜待人無戚踈一以恩意性尤孝友每及父母早世輒流涕篋有杯圈手澤寶藏數十年無一毫遺墜其哭子柔也哀動隣里自年三十八九得痼疾每發輒劇而經繼紀家事不廢精神言語泰然不以為憂顧常勉夫以治生進諸子以學庶幾蒙其成佚其老不幸志未就而病棘矣嗚呼其命也夫男五人璆琛珪一早夭一未名也女三人長適迪功郎田榘次許武岡守羅公之子尚賢季尚幼孫文一人噫夫人之賢

行多矣今不能盡著獨紀其大略如此後世其有考焉某孤苦餘生自紹興癸酉與姊別歷十一年而以罪去朝始得朝夕省侍財三年而遂為之誌嗚呼某尚忍言之

靖州推官張廷傑妻李夫人墓誌銘

紹興三十年

紹興二十九年八月甲寅前靖州軍事推官張君廷傑喪其夫人葬有日使者以狀來請銘某以不文辭推官復書曰士大夫或出或處其行誼才猷皆可表見於世至於夫人女子其處也以組紉婉婉為能已嫁則奉尊章勤盥饋耳隱德懿行微姻黨有所不知

子毋庸辭某因念歲丙子過推官於里第置酒相勞苦時夫人適母宜人胡氏左席老且病奉養為難夫人左右承顏愉愉融融既退則涕數行下若有甚憂者予問推官夫人方喜而悲何也推官曰是新喪介弟而母未之知喜以悅親悲則傷其弟也因為予言夫人婦我纔閱月父母赴官江右朝夕憂念遇心疾者歲餘其後父卒哀毀骨立他日聞誦孝經喪親章輒慟哭愛弟媚尤切有不幸者追悼至忘食事蓋孝友如此以予所見參其所聞賢哉夫人賢哉夫人今既銘其墓不敢隱亦不敢誣察夫人姓李氏世家平

江處士應之曾孫贈右通議大夫雅之孫而左朝請
 大夫通判廣德軍寬之孟女也天資簡靜少長如一
 通判君以才學起家仕于四方為大夫擇佳對以推
 官鄉里盛族方游場屋故婦馬時甫踰笄雖不逮事
 舅姑而承尊撫卑適其戚疎人無間言文叔在室者
 三夫人禮遇勉飭相繼為名人婦當是時平江張氏
 義聲聞湖河以西繫夫人之助推官游不遂築室治
 園圃日從賓客遊而中外冠昏饋問慶弔無虛月夫
 人悉力相之不以累其夫也蓋約於奉已而泰於調
 急誠以禦下而勤訓子故宗族之窮困者多蒙其惠

而長子未冠已藁然薦於鄉先鳴於上庠里閭榮之
 晚事母愈孝謹調旨甘窮澣濯間於温清則讀釋氏
 書平時語默有常度閨門肅如也若無何胡宜人卒
 夫人號慕致疾稍瘳而復作病棘不他及內勉夫以
 教子外則以葬母囑其弟而已享年五十生三男聖
 任聖清聖和三女左從政郎新楊州錄事參軍蔡瑀
 左迪功郎新湖州安吉縣主簿李安上右從事郎孟
 并其婿也仲文先夫人二十八日而夭季未行孫男
 三人鎬鎮鏃葬用三十年二月壬申其地在吳縣長
 州鄉華山天池塢與通判君墓相望也九原有知夫

人其奚憾銘曰

世之百行。惟孝為始。有子有行。鮮克舉此。
溫溫夫人。允有全美。而其愛親。性實天畀。
生也色養。沒也哀毀。嗚呼夫人。可謂孝矣。
我銘函宮。惟是之紀。庶幾無窮。以勸為子。

曾監酒毋孺人劉氏墓誌銘 淳熙二年

分宜宰謝君諤狀右文林郎曾君光庭之夫人劉氏
遺事累千五百言以授夫人之子敏學敏學復屬某
以銘予謂分宜文贍事核益之贅矣敏學曰詳在行
實要在銘章古也固請不已會敏學死予悲其意乃

序而銘之劉氏本長沙人後徙臨江軍之新淦縣夫
人曾祖德誠祖如新父義義有隱德嘗辭遺逸之薦
者賢其息文以婦文林惟夫人幼服姆訓長閑婦道
事^舅姑孝待宗族敬内外交譽間言弗^與文林官湘中
當靖康之難卒零陵民兵勤王夫人力脩閭政日以
詩書課其子姑嚴夫人畱鄉里寇攘梗道數走介間
關問安使文林悉力公家不貽親憂比七年婦奉盥
饋於堂上男愿女柔濟濟列侍嚴夫人喜曰賢哉婦
與吾曾氏矣文林既倦游築大第柱峯之下別開槐
堂招致遊士又以餘力治園圃燕親賓間遇歲歉振

廩平價大花一方夫人實相之文林郎沒益勵諸子
 以學問集賢也可師某能也可友必厚禮重幣延賓
 家塾嘗曰蓄田千畝不如藏書一束故不吝金帛以
 求之棟架幾萬軸子孫聞見寢廣藝業日有聞對策
 集英者三貢于鄉者十二文風藹如也紹興己卯慈
 寧太后慶壽八十有詔子為貢士得封其父母之高
 年者於是有人孺人之命後遇 郊恩加賜冠帔年九
 十三以乾道七年七月二十四日卒是歲十二月丙
 午葬吉州吉水縣仁壽鄉萬安里西岡之原夫人五子
 長右脩職郎饒州德興尉敏遜次鄉貢進士敏脩次

敏德次迪功郎監隆興府豐城縣戶部贍軍酒庫郎
 求銘者次敏行一女適鄉貢進士毛穎士孫男十五
 人三益三錫三復三省三畏三聘三觀三壽三登三
 接三顧三異三協三英三達預貢者三益三省三畏
 而三復三聘相繼擢第今為德安隆興二府教授惟
 三益蚤死餘皆力學女八人曾孫男九人完圖完度
 完議完規完基完模完寄完舉完量女亦九人夫人
 天性勤儉既以自勉亦以誨人御下慈和念勞而忘
 過家寢隆盛不矜不驕年登耄期未嘗謁醫孫曾滿
 前且娛其老世所願欲一無憾焉嗟乎壽福康寧好

完即宏同

唐書卷一百一十五 禮志第五十五
德考終能脩鮮矣而况脂田命服寵光鼎來孝子頌
孫祿養踵至古稱五福今乃七之是宜勒銘以信來
裔銘曰

維德戎戎 維報芄芄 綿延厥家 寧止我躬
鬱其西岡 宜松與栢 奕世不凋 祇此柯葉

王給事母安人徐氏墓誌銘 淳熙三年

淳熙丙申立春氣應 皇帝慶 太皇太后壽於德壽
宮大赦天下文武陞朝官並許家封父母中外蒙恩
者不可計獨計臺省寺監職事官不啻千百人其及
親者纔二十有三而軍器少監兼考功郎官王君之

母太安人徐氏在焉命書既下合監之僚屬暨六曹
同舍郎皆踵門賀退而咨嗟歎息感謂婦人能教子
以儒術起家者固少而有子入為王官者加少若乃
國家非常之慶絲綸再命之寵是又千載而一遇者
非積善在躬享有多福曷至善哉嗚呼可謂難也已
矣可謂榮也已矣居久之太安人疾作少監請于朝
願假使者節若太守章出便醫藥 天子與大臣嘉
少監在考功能以精明澄四選彊毅任衆怨方顯用
之不聽也已而太安人竟卒於是前日之客復弔少
監於廬予亦至焉少監杖而泣曰吾母之賢朝士舉

知之子久以文知我顧不知吾母乎願以銘為托它日遂以其鄉人將作少監兼吏部郎官吾君飛英之狀來則序而銘之徐氏世家處州之青田太安人曾祖新祖崇父頌年二十二嫁同郡王公長方逮事舅姑以孝謹聞王公故貧與二弟大方義方俱嗜學自太安人來婦家事日理不以衣食累其心而專於書故大方登博學宏詞科義方亦有聲上庠起家永福尉獨公困躓不偶與太安人日夜教子及見其登進士第中舉官選而沒後贈有承事郎太安人慈祥勤儉綽有容得待娣姒以誠御婢妾以恩少監每與客語輒耳屬於屏既婦枚數曰某賢可與游某不然勿親也後多如言蓋從其子官于朝者五年劬躬擇鄰迄獲豐報初以乾道九年冬祠恩封太孺人至是蓋進封云其卒實三年四月十六日享年六十有九是歲十二月甲申葬于麗水縣靈隱山承事公之側生三男信即少監也佺嘗與國學薦偁早世一女適進士何京孫三人一男安銘曰

光輝為陽	晦藏者陰	婉婉女士	難乎邦聞
倚歟夫人	克艱于始	祿不從夫	幸哉有子
子也多才	夫人成之	國有大慶	夫人膺之

遂都榮名 人以譽歎 婦安斯立 未矣奚憾

程給事母宜人胡氏墓誌銘 淳熙 年

宜人胡氏故朝散大夫致仕程公晉之之室今給事
中叔達母也徽州黟縣人其先有名育者仕晉為新
安太守因以占籍其後名星為蕭梁大常卿既與而
廟食族系日以蕃宜人曾祖德懃祖義璇俱隱跡弗
躍父猷卿好^賢樂善一鄉稱長者生五女尤憐愛宜人
謂必為名婦聞大夫早有賢譽故以婦焉程氏衣冠
蟬聯與胡氏世通婚姻大夫祖母太碩人世母咸寧
郡夫人母太孺人皆宜人近通屬也始^歸家翁姑高嚴
姊姒如雲宜人恪共盥饋勤劬賓祭承上接下動有
法度中經亂離緒篋一空約身縮用助大夫經理家
事秋毫無妄費至資其子^官學四方則略無所靳給
事以是少年登進士第解褐歸拜重親里閭咨羨翺
翔仕路風節議論日益有聞入佐天府大夫宜人年
皆七十餘休沐必娛侍西湖上間登天竺諸山諸孫
先後扶携二老人輒却之曰吾方健汝毋憂若亡何
長子叔向季子叔豹相繼死宜人始忽忽不樂頗苦
微恙給事亟求守通州以便養未行權登御史府進
左司諫數請外 上固留之宜人亦曰吾念二子耳

汝之去番我何擇焉悉心報主所以慰我心也給事
 乃不敢言明年宜人竟不起實乾道元年八月二十
 壽七十有五後十四年而大夫卒宜人生三子給事
 其仲也二女嫁汪允迪黃珏孫男九人壽鎔鎬早世
 鉉從政郎荆湖北路安撫司幹辦公事錫從事郎婺
 州蘭溪縣主簿鉉銓鉞錡未仕孫文十一人曾孫男
 五人鎮孫子八未名寧孫子六重一早夭宜人初葬
 縣之長遙山大夫以其地下濕別卜地於北山亭古
 城培之原淳熙陸年八月二十九日甲寅葬焉給事
 之為少尹也某備官于朝一見如缺每聞宜人慈惠
 肅敬四德蕪楸知古今通釋氏書常敬仰其賢又聞
 翁媪偕老子孫方昌怡怡愉愉百頌具備未嘗不自
 恨不天不復有此樂也踰一星終復與給事直禁林
 侍經帟僚承華情義款密舉朝莫擬給事每云吾父
 滋老歆改葬吾母而未敢它日尚屬子銘予敬諾已
 而給事以直龍圖閣奉祠歸而大夫沒書求踐言其
 何可食銘曰

婉孌肅莊 以承尊章 儉勒淨方 以從其良
 擇隣儲祉 又燾厥子 展如夫人 不曰矣矣
 匪劬其躬 孰報之豐 謂或不信 盍觀初終

相彼新阡 有原膺膺 和其嗣人 以真終古

葬記

孟媪葬記

佛書云汝未舉心塵勞先起學道者晝夜刮磨其去未銖兩而其積已鈞斤矣所貴乎無心者以其無此患也某之先夫人乳媪孟氏朱嘗學道而能以無心處世故憂樂不能移物我不能貳而其死也超然自在卓然竒特有精鍊老僧不可及者此豈區區刮磨之力哉根器異耳媪東平人父孟某母李氏以元豐元年正月三日生少嘗適人而其夫凡劣不可依李

絕

氏謝絕之携媪來吾外家乳先夫人方外家隆盛時金帛填委同輩皆厚自殖媪視之蔑如也顧獨喜博負雖多惟然無畧容勝亦散之未嘗有所貯積戊申巳酉歲江浙大亂吾家轉側兵火中而先君不幸後十年先夫人復謝世蓋多故矣人為媪戚戚媪固自若也遇博輒袖簪質衣一笑為樂性淳直閱裕待人如我視我如人與童子言不異長者人有不直亦慢罵弗恤其人愧服曰媪言是吾不怨至於事敵以上與夫逢迎賓客則又執禮無違雍容可觀見者知故家遺俗自有體也伯父辰州府君御下嚴甚不假左

右以色獨於媪加礼焉始媪年三十五已受戒屏葷酒時時取佛書誦之亦不深泥色相笑歌嬉遊陶然自樂如是者數十年當紹興壬申秋卧疾于霸會齊述反某與亡弟子柔夜挾媪出城得舟下廬陵寓永和鎮之本覺院其病浸劇盖踰時側身而逝十一月十三也年七十有五時亂未定某亦大病幾死柔遂以茶毗法化媪薪盡頂骨如雪而舌不壞舍利綴屬無數緇素駭歎惟媪性與道合豈以此為異然使不緣倉卒擾攘之故具棺槨以葬則亦何自見此奇特哉後幾日瘞其骨于水東金鳳山某處又後十一年某歸自臨安始為立此石時子柔之没已四年矣悲夫隆興元年七月具位周某某謹記

芸香葬誌

周子充之侍妾曰芸香姓孫氏錢塘人父德以其淳靜謹畏精於文紅顏能為新聲事於予行在年甫十七後二年從予歸廬陵明年六月一日病死為買地州南二十里聖居山葬用七月十八日實乾道九年

省齋文稿卷第三十六

